

# Ruutu

## Obhukangati

Eghitabhu kino :nkihaabhuru eriina re mukari uno are arabherekeru Ruutu, naare omooto o Mowaabhu. Abhamowaabhu mbaare bhatiine na Abhiisiraeri. Nekorighibhu kubha, kwo riibhagha riyu mbaare no obhoghvani bhumangi mo-chaase chiyo ibhere. Eghitabhu kino nkeenyi na amang'ana ghano :ghaköruru korwera eriibhagha rino abhakangati bha riie :bhaare bharakangata Abhiisiraeri (mo-meeka ghe 1375-1050 eriibhagha Yesu are akeere kwibhoru). Kwo riibhagha riyu ase e Abhiisiraeri neere ekeere ghusëema ghukangatu na abhatëmi. Abhakangati mbaare abhaato bhano :bhaare bhahwiru no Omutëmi Waryobha, ghukangata Abhiisiraeri kuröona eriie. Wiiki mbaare bharatena ebhiina bhyaru kwo Bhiisiraeri (mööhi Eghitabhu ke Bhakangati 2:10-19).

Ameeghi amakoro ghano tokwegha mo-ghitabhu kino n-kubha, orubhango ro Ryobha n-kwo abhaato bha chaase choose. Omutëmi Waryobha akamwitabheri Ruutu na komuköra kubha omwibhori o mumbërë mo-rwibhoro ro mutëmi. Mo-rwibhoro ruyo nimu arweriire omutëmi Tauti, akamara Yesu Kirisito woose akarwera-mu. Mo-ghitabhu kino, obhuhörëeru na asooko e Ruutu, mo-rwibhoro ro mosubhe waache mbumanyëkiine. Wiiki no obhuchömu bho ghareeya e Mutëmi Waryobha, kobhatugha abhaato bhaache kwo riibhagha re nyaako, akabha arabhaha changuru bhano :bhaare bharanyaakibhu.

## Aka e Erimereeki eghaye Mowaabhu

**1** <sup>1</sup> Kare haare hano abhakangati bha riie :bhaare bharakangata Isiraeri, hakarwera aghëëcha ihaari chwee mo-se iyo yoose. Ibheere omooto umu koru mo-moghya o Bheserehemu mo-se e Yuteya, haghirohamu na mukaache na bhaana bhaabho bhabhere bha ghesubhe bhaaghaye kumënya mo-se e Mowaabhu kinya abhaghëni. <sup>2</sup> Omooto uyo naare arabherekeru Erimereeki\* na mukaache naare arabherekeru Nawomi.\* Abhaana bhaabho mbaare bharabherekeru Marooni\* na Kiriyani.\* Omooto uyo na abhaato bhaache bhoose mbaare bha mo-rwibhoro ro Ebhuraati koru mo-moghya o Bheserehemu mo-se e Yuteya. Abhaato bhayo bhakahika mo-se e Mowaabhu bhakamënya iyo.

<sup>3</sup> Hano :bhaare iyo, Erimereeki mosubhe o Nawomi aghaku, Nawomi aghasaagha mosino na abhaana bhaache bhabhere. <sup>4</sup> Abhahureni bhayo bhaghakwira abhagiikoro koru mo-se iyo e Mowaabhu. Amariina gha bhakari bhayo, umu naare arabherekeru Ruutu no owonde Oribha. Ibheere ghiiche koheta kinya emeeka ikomi hang'u, <sup>5</sup> abhahureni bhayo bhabhere Marooni na Kiriyani bhoose chaasiko cheekabhare. Ibheere Nawomi aghasaagha ataanyi na mosubhe koru omoona.

## Nawomi na Ruutu bhaaghaye Bheserehemu

<sup>6</sup> Chaasiko chiiche koheta, Nawomi akooghu amang'ana kubha Omutëmi Waryobha nabhitabhiiri abhaato bhaache gho kobhaha ebhiinyakure. Ibheere

---

\* 1:2 *Erimereeki* egheteemoro keeche Eryobha niryo Omutëmi.

\* 1:2 *Nawomi* egheteemoro keeche n-omughareeya.

\* 1:2 *Marooni* egheteemoro keeche n-obhoshagha.

\* 1:2 *Kiriyani* egheteemoro keeche n-ngokindu.

akabhooka ghugharuka bhowaabho iwe na abhakamoona bhaache. <sup>7</sup> Mbe, akuru hayo are asamiire, aghaghöötana na abhakamoona bhaache, bhaghatacha anchera ghuye mo-se e Yuteya.

<sup>8</sup> Ibheere hano :bhaare mo-nchera Nawomi akabhabhoorera abhakamoona bhaache bhabhere akabhugha, “Omooto woose nagharuke awaabho. Wiiki nekobhasabhera kwo Omütëmi Waryobha abhe muhëënë ghokoonyu kinya inyu mubheere bhahëënë ghokoone na kwo bhaato bhaane bhano bhakuure. <sup>9</sup> Omütëmi Waryobha abhasakeri mooto woose abhënë omosubhe ne erimënya ichömu mo-ka yaache.” Akamara Nawomi akabharagha gho kobhatahata.

Nabho abhakamoona bhayo bhaghasëëma korera gho ghotiiri amaraka <sup>10</sup> bhakamobhoorera, “Aa tiyaanyi! Ntooghuye haghirohamu na niye mo-bhaato bhaacho.”

<sup>11</sup> Ibheere Nawomi akabhasasaama arabhugha, “Mugaruke bhaana bhaane. Kana neke moghuntambanera? Kana moghwituuri kubha nekubhöna abhaana bhano bhaghotora kobhakwira wiiki? <sup>12</sup> Mugaruke mo-chaaka cheenyu, gho kubha eni nimariri ghokunguha nteghotora ghokwuru wiiki. Koru nengabhugha kubha neenyi na amitëng’ërö gha kubhöna omosubhe obhotiko bhuno neramara niibhore abhaana bha ghesubhe, <sup>13</sup> ibheere mongatoriri ghwiköng’ëëri mbagha bhabhe abhanto monkoro bhaache bhabhakwire? Wiiki mongatoriri ghwiköng’ëëri motakwuru na abhasubhe abhande? Taanyi hang’u bhaana bhaane! Eni nebhwine obhororo ghokera inyu, gho kubha Omütëmi Waryobha naamariri ghontigha.”

<sup>14</sup> Bhaache kooghu amang’ana ghayo bhaghatiiri amaraka bhaghasëëma korera wiiki. Ibheere Oribha akamutahata nyina bhiyaara akamuragha, amare Ruutu akaanga aghaghöötana nawe.

<sup>15</sup> Ibheere Nawomi akamobhoorera Ruutu akabhugha, “Mööhi mughëndi waacho naghrokiri awaabho na kwo musambu waache. Mbe, kana iye woose nugharuke omutambane mughëndi waacho.”

<sup>16</sup> Ruutu ache kooghu ghayo akamugarokeri, “Otighe ghunsasaama angu neghotighe iye, wiiki otandeki ghoghutambana. Hohoose hano iye oraghe eni woose niho ngyue, hayo oriikara eni woose niho ngwikara. Abhaato bhaacho mbaakubha abhaato bhaane ne Eryobha reecho ndeekubha Eryobha reene. <sup>17</sup> Hano okuucha ghokwera niho eni woose neghokwera, niho hayo wiiki nekuucha koryeku. Egheghiro ghyokyose kerantaani na niye Omütëmi Waryobha andöönë, naanyinga oroko orwene.”

<sup>18</sup> Hano Nawomi aroche kubha Ruutu akahënerëra bhahinane nawe, aghatigha komusasaama kubha agharuke awaabho. <sup>19</sup> Niho bhombe bhabhere bhaghaghööta orughëndö ghuye mo-moghya o Bheserehemu. Hano bhahikiri abhaato bhoose bhakabharoghora, abhakari bhaakabha bharabhoorani, “Kana! Uno n-Nawomi?”

<sup>20</sup> Niho Nawomi akabhagharokeri akabhugha, “Eni motamberekera Nawomi wiiki, momberekere Maara,\* gho kubha Eryobha re Bhotoro Bhoose ndiköriiri erimënya reene ribhe iroso chwee. <sup>21</sup> Eriibhagha neeruure hano neere ne ebhighiro bhyaru chwee, amare ibheere Omütëmi Waryobha ^aghangaroki hano, neenyi mabhökö bhoowa. Ngwake mokomberekera Nawomi naho Omütëmi Waryobha o Bhotoro Bhoose nandööniri na kunyaaki chwee?” <sup>22</sup> Hang’u nibhu Nawomi no omukamoona waache o Mowaabhu bharuure mo-se e Mowaabhu ghugharuka mo-moghya o Bheserehemu. Eriibhagha riyo mbaare ^bhaghasëëma ghughësa omunöghö o shayiri.\*

\* 1:20 *Maara* egheteemororo keeche n-obhororo.

\* 1:22 *Ashayiri* iyo netubhiine amahemba.

### Ruutu <sup>^</sup>aghatëmëërana na Bhowaasi

**2**<sup>1</sup> Ibheere Nawomi naare no omohiiri waache kuru mo-rwibhoro ro Erimereeki mosubhe waache, akobherekeru Bhowaasi. Mohiiri waache uyo naare mooto mokoro wiiki moniibhi are. <sup>2</sup>Orosiko rumu Ruutu o Mowaabhu akamobhoorera nyina bhiyaara akabhugha, “Ibheere nonyiisherereri neghi mo-meghondo ghutööra bhino bhaakubha bhatighiri abhaghësi. Neghotora kubhöna omooto uno aghotora konyiisherereri nitöörë anyuma yaache.”\*

Nyina bhiyaara akamugharokeri akabhugha, “M-bhoheene moona waane nughëndë.”

<sup>3</sup>Mbe, Ruutu aghaye mo-moghondo umu ghutööra ebhisaawa. Hano ahikiri akabha arabharu anyuma abhaghësi, aratööra ebhibhaawa bhino :bhaare bharatigha abhaghësi bhayo. Niho aghatookera anyi mo-moghondo o Bhowaasi uno are o mo-rwibhoro rwi she bhiyaara Erimereeki.

<sup>4</sup>Eriibhagha riiche koheta Bhowaasi akaacha ararwera Bheserehemu akabhakëeri abhaghësi bhayo akabhugha, “Omutëmi Waryobha abhe haghirohamu na niinyu.”

Nabho bhakamugharokeri, “Omutëmi Waryobha aghwitabheri.”

<sup>5</sup>Ibheere Bhowaasi akamobhoori uno are imereriire abhaghësi bhayo akabhugha, “Kana omuuke uno waawe?”

<sup>6</sup>Omwiimeereri uyo akamugharokeri akabhugha, “Omuuke uno, wuure o Mowaabhu uno ichiri na Nawomi kuru mo-se e Mowaabhu. <sup>7</sup>Niichiri aghansabha nemwisherereri abharu anyuma abhaghësi, abhe aratööra ebhisaawa bhino bhaakubha bhatighiri mo-matuumu. Kuru hang’u naköriiri omoremo uno korwera atabhoori n-ibheere <sup>^</sup>aghaye koweera mo-kebhuru.”

<sup>8</sup>Niho Bhowaasi akamobhoorera Ruutu akabhugha, “Tëghëërëra muuke waane, otabha oraye ghutööra ebhisaawa mo-meghondo eghende, oyi oratööra mo-moghondo uno oweene. Wiiki ughöötane na abhasubhaati bhaane. <sup>9</sup>Umööhi hano bhaakubha bharaghe ghughësa, ubhe orahinana nabho. Nebhashaang’iri abhahurenani bhano bhaanyi hano bhatakunyaaki. Wiiki orooghu anyoota oghi onyo amanche mo-chanyongo chino bhatahiire-mu abhahurenani bhayo.”

<sup>10</sup>Ruutu ache kooghu amang’ana ghayo, akabhuna ebheru akihiinya mbagha haase gho sooko ambëre e Bhowaasi akamobhoorera, “Niibu <sup>^</sup>ngaköra <sup>^</sup>okanyisherereri. Wiiki <sup>^</sup>okandigheri changori na kubha eni m-mughëni neenyi?”

<sup>11</sup>Nawe Bhowaasi akamugharokeri akabhugha, “Nyoghwire ghoose ghano omuköriire nyako bhiyaara korwera hano mosubhe waacho akweriire. Nyeche kinya otighiri abhiibhori bhaacho, oghatigha ase yaacho na kinya wiichiri kumënya mo-bhaato bhano otabeeche. <sup>12</sup>Omutëmi Waryobha aghwitabheri gho ghoose ghano uköriiri. Omutëmi, Eryobha re Isiraeri rino ung’osiire mo-mabhabha ghaache gho ghoghochonga, rekuhe atuhu ino irëng’aniire.”\*

<sup>13</sup>Ruutu aghagharokeri akabhugha, “Oo omutëmi iye nunköriire amachömu maaru chwee. Nangabha nteenyi ghate e bhatamishi bhaacho, nontooriri omuköro, wiiki nosikiire na neeni kwo bhuchömu.”

<sup>14</sup>Ibheere eriibhagha re ndaaghera Bhowaasi akamughënëni Ruutu akabhugha, “Ishuka hano, uche ori omughaate, wiiki ubhe oraköri mo-divaayi yiiti.” Mbe,

\*2:2 *nitöörë anyuma yaache* Emeghiro ngeere gherabhugha kubha, omooto orabha oraghësa, nokwenderu oyi oraheteereri ebhende abhahabhe na abhaghëni bhabhe bharatööra. Mööhi Abharaawi 19:9-10, 23:22.

\*2:12 Mööhi Sabhuri 91:4

Ruutu aghiikara haghirohamu na abhaghësi bhayo, Bhowaasi akamuha chaahëkë chino chikarangiri akare aghiighota ne echende aghasaaghi.

<sup>15</sup> Hano bhamariri andaghera, Ruutu akimeerera akeenderera ghutööra omunöghö o shayiri, Bhowaasi akabhabhoorera abhaköri bhaache bha meremo akabhugha, “Momotighe akome koru mo-matuumu motamurëki. <sup>16</sup> Wiiki hano mookubha moraghësa momorutere ebhisaawa koru mo-chaasa chino mookubha mubhöhiri momotighere atööre motamurëki.”

<sup>17</sup> Ibheere Ruutu akeenderera ghutööra ebhisaawa mbagha omughörööbha, hano ahooriri ashayiri iyo aghiichori eritëbhë rimu no obhusaagho.

### Ruutu ^aghagharuka o-Nawomi

<sup>18</sup> Hano amariri aghitweka ashayiri iyo aghaye o-nyina bhiyaara komwerekü kino atööriri. Wiiki akamuha ebhiinyakure bhino araghiire aghiighota bheghasaagha.

<sup>19</sup> Ibheere nyina bhiyaara akamobhoori, “Bhino bhyose hayi obhitöriire reero? Kana mo-moghondo waawe ore? Ng’oni uno aghotooriri.”

Mbe, Ruutu akamugharokeri nyina bhiyaara akabhugha, “Neere neraköra emeremo mo-moghondo o mooto umu akobherekuru Bhowaasi.”

<sup>20</sup> Nyina bhiyaara ache kooghu ghayo, akamobhoorera omukamoona waache akabhugha, “Omutëmi Waryobha amwitabheri Bhowaasi. Eryobha ndehahikeerani aghareeya yaache kwo bhaato bhano bhaanyi bhahöru na kwo bhaato bhano bhakuure.” Wiiki akeengera kobhugha, “Omooto uyo m-mohiiri wiito o haghuhe woose n-umu mo-bhano bhakwenderu ghototugha.”\*

<sup>21</sup> Niho Ruutu o Mowaabhu akamobhoorera, “Wiiki nweche, namboriire nighöötane na abhahöki bhaache bha meremo mbagha hano bhakumarera erighësa reeche ryose.”

<sup>22</sup> Mbe, Nawomi akamobhoorera omukamoona waache akabhugha, “Moona waane, neekubha bhoheene ghuköra emeremo haghirohamu na abhasubhaati bhaache. Oraghe ghuköra emeremo mo-meghondo ghe bhaato abhande mbaghotora ghokunyaaki.”

<sup>23</sup> Gho ghayo, Ruutu aghaghöötana nabho ghuköra omoremo, mbagha hano omoremo o ghotu ashayiri na angano osiriri. Kwo riibhagha riyo ryose Ruutu naare ariikara na nyina bhiyaara.

### Ruutu ^akarwachu kubhöna omosubhe

**3**<sup>1</sup> Orosiko rumu, Nawomi akabhoorera omukamoona waache akabhugha, “Moona waane nengabheere bhoheene neghutabharere omosubhe o ghoghotugha, kubha ubhöne amachömu. <sup>2</sup> Weeche Bhowaasi uno ore oraköra emeremo na abhaake bhaache, m-mohiiri wiito o haghuhe. Mbe tëghëerë, omughörööbha uno o reero naakubha arahoora ashayiri mo-robhooka roche.

<sup>3</sup> Ibheere iye nooyi wishaabhe wiihakë amaghuta gha keneeso no obheeke bhoheene. Oramara oghi ahaghiro hano akohoorera, amare wichonge atamanya kubha hayo onyi. Otighe singa amare kuraaghera na kunyo. <sup>4</sup> Wiiki umanye hayi akomisi, aramara komisi oghi kiihoru obhushure mo-maghoru ghaache wiraari hayo.\* Arabhooka naghokobhoorera kino oghuköra.”

<sup>5</sup> Niho Ruutu aghagharokeri, “Neghuköra ghoose kinya omboriire.” <sup>6</sup> Ibheere Ruutu aghaye mo-robhooka ruyo, aghaköra kinya nyina bhiyaara amobhoriire.

\* 2:20 Mööhi Abharaawi 25:25

\* 3:4 *Kobhushura amaghoru na kwiraari*, gho sughara e Kebhuraaniya, neere erereki kubha naghusabha amokwire na komotugha.

<sup>7</sup> Mbe, Bhowaasi hano amariri kunyo na kuraaghera aghachömëru. Ibheere aghaye haghuhu ne erituumu re shayiri akamisi hayo. Hano Ruutu arooche ^akamisi, aghaye kiihoro akabhushura angibho mo-maghoru ghaache akiraari woose hayo. <sup>8</sup> Obhotiko bho ghaate Bhowaasi aghiitaki, aghishoorori, akabhöna omukari amisiri haghuhu na amaghoru ghaache.

<sup>9</sup> Ibheere Bhowaasi akabhoori, “Aa! Kana niwe uno?”

Ruutu akamugharokeri akabhugha, “Neeni Ruutu, omubhaghati waacho. Neghusabha ontughe,\* gho kubha iye m-mohiiri waane onyi uno okwenderu ghontugha.”

<sup>10</sup> Bhowaasi akamugharokeri akabhugha, “Omuuke waane Omutëmi Waryobha aghwitabheri, gho kubha gho ghoose ghano oghuköra nokwereki asooko inkoro kwo bhaato bhiito ghokera ghano uköriri hayo ekimbërë. Tobhatabhiire abhabhureni abhahabhe hamu abhaame bhaghokwire. <sup>11</sup> Ibheere muuke waane otatiina, neghoghukörëra ghyokyose kino orasabha, gho kubha mooto woose o mo-moghya uno neeche kebhuo onyi na asughara inchömu. <sup>12</sup> M-mahëënë kubha nekwenderu ghoghotugha, amare naanyi-ho uno akwenderu ghoghotugha, uno anyi haghuhu ghokoonyu ghonkera eni. <sup>13</sup> Ibheere iye nwikare hano obhotiko bhuno, na hano bhooghuke ntokorighi aribha aghwishereri ghoghotugha hamu tiyaanyi. Aribha ariishereri ghoghotugha m-bhoheene. Wiiki araanga eni kwo riina re Mutëmi Waryobha neghoghotugha. Noomisi hano mbagha bhoki.”

<sup>14</sup> Mbe, Ruutu akamisi hayo haghuhu na amaghoru ghaache mbagha atabhoori. Akabhooka hakeere kubha abhaato bhatamorighi, gho kubha Bhowaasi teendiri abhaato bhamënyë kubha Ruutu naare ahaghiro hayo ha kohoorera. <sup>15</sup> Ibheere Bhowaasi akamobhoorera akabhugha, “Nware angibho yaacho haase hano.” Ruutu aghaköra kinya Bhowaasi amobhooriire. Bhowaasi akamotoorera ashayiri kinya riitëbhë rimu no obhusaagho, akamwitweki. Ibheere Ruutu aghagharuka o-nyina bhiyaara.

<sup>16</sup> Hano Ruutu ahikiri aka, nyina bhiyaara akamobhoori akabhugha, “Nibhu ghabheere iyo moona waane?”

Ruutu akamobhoorera ghoose ghano Bhowaasi amuköriire. <sup>17</sup> Wiiki akeengera kobhugha, “Namboriire netagharuka aka o-mabhiyaara neenyi mabhökö bhoowa. Ibheere aghantahera eriiitëbhë rimu no obhusaagho re shayiri.”

<sup>18</sup> Niho Nawomi woose aghagharokeri akabhugha, “Ibheere horeera moona waane, mbagha orighi kino ghekuucha korwera. Bhowaasi taghwikara na amang’ana ghano mbagha reero aghahikeerani ghoose.”

### Bhowaasi ^akamokwira Ruutu

**4** <sup>1</sup> Bhowaasi aghaye ahaghiro hano bhahaakörëra ekiina mo-kehita ke moghya, aghiikara hayo. Akamara omohiiri o Erimereeki uno Bhowaasi are amutariri kubha n-o haghuhë akaheta hayo. Bhowaasi akamobherekera akabhugha, “Nuuche hano mohiiri waane.” Mbe, omooto uyo woose akaacha, aghiikara hayo. <sup>2</sup> Ache kumara Bhowaasi akabherekera abhagharuka ikomi koru mo-moghya uyo, akabhabhoorera bhoose bhiikare hayo.

<sup>3</sup> Niho Bhowaasi akamobhoorera omohiiri waache uyo o haghuhu akabhugha, “Ibheere Nawomi uno agharokiri koru mo-se e Mowaabhu, nisheriiri kuhaana nekumhondo uno ore o mohiiri wiito Erimereeki. <sup>4</sup> Mbe eni nerooche ng’oni nekumënyi ang’ana ino. Ibheere aribha okwenda kowimoki omoghondo uno, obhughe ambërë e bhagharuka na abhaato bhano. Wiiki aribha otakowenda

\* 3:9 Hano akobhugha *neghusabha ontughe*, Ekebhuraaniya ngekobhugha *neghusabha ombishi omwando*.

obhughe, gho kubha omweya o mumbërë o kowotingori n-o waacho no o kabhere n-o waane.”

Iwe aghagharokeri akabhugha, “Eni nekowotingori.”

<sup>5</sup>Ibheere Bhowaasi akamobhoorera akabhugha, “M-bhoheene, amare orawimoki omoghondo uyo koru o-Nawomi, umënyë kubha nookubha omughëghiri omosino Ruutu o Mowaabhu, gho ghiri obhooki eriina re mosiri ne ebheghiro bheeche.”

<sup>6</sup>Ache kooghu amang’ana ghayo, omohiiri uyo o haguhe aghagharokeri akabhugha, “Aribha hang’u keenyi, eni ntekowotingori omoghondo uyo, gho kubha nerighi neghusari aghabho yaane. Ng’oni omweya waane o kowotingori nekuhe iye, gho kubha eni nteeghotori kowotingori.”

<sup>7</sup>Mo-chaasiko chiyo mo-se e Isiraeri, kurëng’aana na asughara yaabho, aribha abhaato bheendiri ghotingori hande ghokerani egheghiro, omooto uyo naare areenderu ereki ekyerekereri gho koruusi eghekweri keeche na komuha mughëndi waache. Gho kyerekereri kiyo, Abhiisiraeri mbeerekiri kubha mbishereriini kwo mang’ana ghayo. <sup>8</sup>Mbe, omooto uyo akamobhoorera Bhowaasi akabhugha, “Ibheere neghaghotighera iye ughëghë omoghondo uyo.” Niho akaruusi eghekweri keeche akamuha Bhowaasi.

<sup>9</sup>Niho Bhowaasi akabhabhoorera abhagharuka na abhaato bhoose bhano :bhaare hayo akabhugha, “Reero inyu n-abhiibhateri bhaane moonyi. Morooche kubha nighëghiri bhyose bhino bheere bhe Erimereeki na abhaana bhaache Kiriyani na Marooni, koru o-Nawomi. <sup>10</sup>Wiiki omosino Ruutu o Mowaabhu muka Marooni, nekamughëgha abhe mukari waane. Amiishererani ghano ngaghuköra ebheghiro bhe mosiri ghusaagha kwo bhaato bhaache ne eriina reeche retabhora mo-bhahiiri bhaache na mo-moghya uno. Reero ino inyu n-abhiibhateri bhaane gho ghano ghakoruru.”

<sup>11</sup>Mbe, abhagharuka bhano :bhaare mo-kehita ke moghya na abhaato bhoose bhano :bhaare hayo bhagharokeri akabhugha, “M-mahëënë itu n-abhiibhateri bhaacho toonyi. Omutëmi Waryobha amotoori omoghiikoro uno, ayi akwibhorere abhaana bhaaru kinya Raheeri na Reeya, bhano :bhaare simoka e bhaana bha Isiraeri. Na niye wiitabheru mo-rwibhoro ro Ebhuraati, wiiki ubhe na aghongo mo-bhaato bha Bheserehemu. <sup>12</sup>Abhaana bhano Omutëmi Waryobha aghokuha, kohetera omoghiikoro uno, bhatubhaane na abhaana bha Bhareesi, bhano Tamaari amwibhoriire Yuuta.”\*

### Orwibhoro ro Bhowaasi

<sup>13</sup>Ibheere Bhowaasi akamwimoki Ruutu akabha mukaache. Mbe, Omutëmi Waryobha akamukangata Ruutu aghaghööta anda, aghitoora omoona o ghesiite. <sup>14</sup>Ibheere abhakari bha moghya uyo bhakamobhoorera Nawomi bhakabhugha, “Aghongibhu Omutëmi Waryobha uno ataghotighiri reero otaanyi no omohiiri o haguhe o ghoghotugha. Wiiki omoona uyo abhe na aghongo inkoro mo-Bhaisiraeri. <sup>15</sup>Iwe naghoghugharokeri obhuhöru na ghoghotugha mo-bhokungu bhoocho, gho kubha omukamoona waacho uno aghosiighiri, uno anyi no obhwera ghokera abhaana bha ghesubhe mohungate, niwe amwibhwire.” <sup>16</sup>Ibheere Nawomi akamughëgha omoona uyo akamotoora mo-ghekubha keeche, akabha omurëri waache.

\* **4:12 Bhareesi** naare sookoro o bhasookoro mo-rwibhoro ro Bhowaasi.

<sup>17</sup> Abhaatani bhaache bha ghikari bhakamoroka omoona uyo eriina Obheeti\* bharabhugha, “Omoona nibhwiru o-Nawomi.” Akamara Obheeti akiibhora Yeese, uno ibhwire Tauti.

<sup>18</sup> Chino nicho chanyiibhoro che Bhereesi, Bhereesi akiibhora Hesirooni.

<sup>19</sup> Hesirooni akiibhora Raamu, na Raamu akiibhora Aminataabhu.

<sup>20</sup> Aminataabhu akiibhora Nashooni, na Nashooni akiibhora Sarimooni.

<sup>21</sup> Sarimooni akiibhora Bhowaasi, na Bhowaasi akiibhora Obheeti.

<sup>22</sup> Obheeti akiibhora Yeese, na Yeese akiibhora omutëmi Tauti o Bhiisiraeri.

---

\* 4:17 *Obheeti* egheteemoro keeche n-omutamishi.